

Nihánj me 'o yanj cartá qui'yaj síí cu'naj Pabló ca'néé so' rihaan nij yuvií noco' man Diose yanj estadó cu'naj Galacia a

1 Síí cu'naj Pabló mej, ne dan me se gaa cavi' Jesucristó, ne cunuu i'na' uún so', qui'yaj Diose, ne Jesucristó do', Rej ní' Diose do', me roj síí cune' mán 'unj guún 'unj apóstol nata' se-nana Jesucristó rihaan cunudanj nij yuvií man rihaan chumií a. Nuveé inanj yuvií me síí cune' mán 'unj ma'. Ma'an ya Diose cune' mán 'unj adonj. ²Dan me se taran' nij tinúú ní' síí ne ga 'unj ro', 'yaj yanj cartá nihánj ga 'unj, ne ca'nej núj yanj nihánj rihaan nij soj sij amán rá ni'yaj man Jesucristó sij yanj nij chuman' naj rihaan estadó Galacia a. ³Dan me se me rá núj qui'yaj Rej ní' Diose qui'yaj Jesucristó sij 'nij ra'a man ní' qui'yaj ndo'o se luj che'é nij soj, ne me rá núj gaa xej nimán soj qui'yaj roj so' adonj. ⁴Dan me se chi'ii vaa nimán yuvií man rihaan chumií nihánj cuano, ne me rá Rej ní' Diose quinanií ní' rihaan sayuun quiran' nij yuvií man rihaan chumií nihánj, ne che'é dan ca'vej Jesucristó sij 'nij ra'a man ní' cavi' ya ma'an so' che'é

cacun' tumé ní' adonj. ⁵Sa' uxrá vaa 'yaj Diose, cataj ní' nu' cavii nu' ca'anj a. Veé danj gaa ya ei.

**Nana nihánj taj xna'anj
se vaa se canoco' ní' yo'ó
nana ma'. Maan se inanj se-nana
Jesucristó canoco' ní' a**

⁶Ne ne'en uxraj me che'é me rá nij soj tanáj ra'yanj soj man Diose ne canoco' soj yo'ó nana ma'. Ne'en soj se vaa qui'yaj ndo'o Jesucristó se luj che'é soj, ne che'é dan canacúún ma'an Diose man soj canoco' soj man so', ne me che'é me rá soj tanáj soj man Diose ga. ⁷Nuveé se vaa yo'ó se-tucuanj Diose ma'. Maan se vaa nij síí me rá naqui'yaj ino se-tucuanj Jesucristó chuguanj. Tzaj ne inanj se-nana Diose nana cataj xna'anj núj rihaan soj che'é Jesucristó me nana sa' adonj. ⁸Che'é dan se ca'vej rá soj nata' yuvií yo'ó nana naca rihaan soj mei. 'O se inanj nana nata' núj rihaan soj asij rque ro', cuchuman rá soj ei. Dan me se ca'vee se ndaa ma'an núj

do', ca'vee se ndaa 'o se-mozó Diose nanij rej xta' do', nata' yo'ó nana naca rihaan soj, tzaj ne yo'o guun ya rá soj se vaa quiran' ndo'o síí a'mii yo'ó nana yo' sayuun qui'yaj Diose á. 'O se taj síí no xcúún natuna se-nana Diose ma'. ⁹Dan me se aj cataj xna'anj núj rihaan soj, ne cuano nihánj me cataj xna'anj uún 'unj rihaan soj, se vaa sese ino gaa nana nata' yo'o so' rihaan soj ga nana canoco' soj asij rque, ne guun ya rá soj se vaa quiran' uxrá síí nata' yo'ó nana yo' sayuun, qui'yaj Diose ei.

Nana nihánj taj xna'anj se vaa inanj me rá síí cu'naj Pabló gaa niha' rá Diose ni'yaj Diose man so' a

¹⁰Me rá 'unj gaa niha' rá yuvii ni'yaj yuvii mán 'unj, rá soj na'. Taj mei. 'O se inanj me rá 'unj gaa niha' rá Diose ni'yaj Diose manj ei. Dan me se gaa rque me se inanj me rá 'unj gaa niha' rá yuvii ni'yaj yuvii manj, tzaj ne yaj ro', me taj ma'. Sese inanj guun rá 'unj gaa niha' rá yuvii ni'yaj yuvii mán 'unj, ne nuveé sij 'yaj suun che'é Jesucristó mé 'unj a man chuguanj.

Nana nihánj taj xna'anj se vaa nana a'mii natáj Pabló ro', orún' Jesucristó me síí tucu'yón nana yo' man so' a

¹¹Me rá 'unj xcaj nij soj cuentá se vaa se-nana Diose nana sa' a'mii natáj 'unj ro', nuveé nana cavii raaj yuvii me nana yo' ma'. ¹²Ne nuveé yuvii nata' nana yo' rihanj ma'. Ne taj síí tucu'yón nana yo' manj ma'. Tzaj ne ma'an ya Jesucristó me síí qui'yaj xcaj 'unj cuentá che'é nana sa' yo' adonj.

¹³Aj ne'en soj daj vaa raj asij rque doj adonj. Dan me se gaa canocó'

'unj tucuáán noco' nij yuvii israelitá, ne dan me se qui'yaj ndo'o 'unj sayuun man taran' nij síí cuchumán rá ni'yaj man Diose, ne qui'yaj suun uxrá 'unj che'é se me rá 'unj tiri' 'unj man nij so' a. ¹⁴Ne tucuáán noco' nij yuvii israelitá ro', 'unj me síí noco' sa' doj tucuáán yo' rihaan que'ee nij tuví' 'unj síí israelitá vaa cuyaán ga 'unj ei. Ne 'unj ro', me síí a'née sa' doj nu' se-tucuanj xií 'unj sij israelitá adonj.

¹⁵Tzaj ne asij ataa ca'ngaa 'unj, ne guun rá Diose se vaa qui'yaj sunj che'é so' ei. Dan me se qui'yaj ndo'o Diose se luj che'ej se vaa canacúún so' manj qui'yaj sunj che'é so', ¹⁶ne tihaan so' ta'níí so' Jesucristó rihanj, che'é se me rá so' ca'anj 'unj nata' 'unj se-nana so' nana sa' rihaan nij yuvii yanij nanj adonj. Tzaj ne 'unj me se a doj ne ca'anj 'unj xna'anj 'unj man yuvii daj qui'yáj canocoj man Diose ma'. ¹⁷Dan me se vaa nij síí yanj chuman' Jerusalén, ne apóstol cune' Jesucristó nata' se-nana so' rihaan yuvii me nij so', ne dan me se asij ataa cune' Jesucristó mán 'unj ro', cune' Jesucristó man nij so', tzaj ne ne cuchi' 'unj rihaan nij so' xna'anj 'unj man nij so' daj qui'yáj ma'. Maan se ra'yanj ca'anj 'unj cuaj estadó Arabia, ne canicaj 'unj ca'naj chuman' Damasco adonj.

¹⁸Quisij va'núj ya yo' nocoj man Jesucristó ta' asuun, gaa ne ca'anj 'unj chuman' Jerusalén, gaa ne cunuu yaan 'unj man síí cu'naj Pedró a. Dan me se nanó 'unj cuentó ga so', ne cayáán 'unj tucúa so' rque xnu' güii a. ¹⁹Ne dan me se gaa canej ga so' me se quene'enj

man sí cu'naj Santiagó tinúú sí 'nij ra'a man ní' uún a. Tzaj ne orún' so' quene'enj nanj á. Ne ne quene'en 'unj man yo'ó nij apóstol ma'.

²⁰Ne'en ya Diose se vaa ya vaa nana nihánj nana cachrón 'unj rihaan yanj nihánj adonj. Nuveé nana ne me nana nihánj ma'.

²¹Dan me se curihanj 'unj chuman' Jerusalén, ne cachéé 'unj nu' chuman' naj estadó Siria do', nu' chuman' naj estadó Cilicia do', ²²tzaj ne nij sí man estadó Judea sí cuchumán rá ni'yaj man Jesucristó ro', me se ne quene'en nij so' mán 'unj ma'. ²³Maan se cuno nij so' cuentó cataj xna'anj tuvi' nij so' che'é 'unj se vaa sí chi'ii ndo'o mé 'unj, tzaj ne yaj nihánj cuano me se sij a'mii natáj se-nana Diose mé 'unj cuano, taj nij so', caráya'anj nij so' a. “Sí qui'yaj ndo'o sayuun man ní' gaa rque me se cuano nihánj nata' ma'an so' nana sa' nana noco' ní' nana me rá so' tiri' so' gaa rque chuguanj”, taj tuvi' nij so' a.

²⁴Dan me se caráya'anj ndo'o nij so', ne cataj nij so' se vaa sa' uxrá qui'yaj Diose se vaa quene'en nij so' manj a.

2 Dan me se cachén xca'anj yo' gaa curihanj 'unj chuman' Jerusalén, gaa ne canicaj uún 'unj ca'anj 'unj chuman' Jerusalén ga sí cu'naj Bernabé, ne dan me se nicaj núj man sí cu'naj Titó ca'anj núj rej yo' a. ²Dan me se ca'anj 'unj chuman' Jerusalén, che'é se cataj xna'anj Diose rihaan 'unj se vaa me rá Diose ca'anj 'unj chuman' Jerusalén, ne cataj xna'anj 'unj rihaan nij tinúú ní' sí israelitá daj vaa nana sa' nana ca'mii natáj 'unj

rihaan nij soj sij yanj a. Tzaj ne quirii yanj 'unj man nij sí uun chij doj rihaan nij so', ne natá' 'unj rihaan ma'an inanj nij so' che'é nana a'mii natáj 'unj rihaan nij soj a. Dan me se me rá 'unj xcaj sa' nij sí uun chij yo' cuentá daj vaa se-nanaj, gaa ne se gaa nanj tiri' nij so' nu' suun qui'yaj suun 'unj che'é Jesucristó a.

³Ne nicun' sí cu'naj Titó ga 'unj, ne nda' se nuveé sij israelitá me so', tzaj ne ne qui'yaj nij sí man Jerusalén fuerzá man so' cata' ta'nga' man so' ma'. ⁴Tzaj ne doj nij sí tiha' yu'unj, ne dan me se taj nij so' se vaa tinúú ní' me nij so', tzaj ne nuveé tinuj ní' me nij so' ma'. 'O se tu'va rma'an nij so' nanj adonj. Dan me se catáj yuve nij so' rej nuu chre' núj, ne me rá nij so' quene'en yuve nij so' daj qui'yaj núj a. Tzaj ne xa' ní' sij canoco' man Jesucristó, tzaj ne daj chihaa mij ne nó xcúun ní' canoco' ní' nu' se-tucuanj Moisés a ma'. Che'é dan guun rá nij so' xcaj nij so' cuentá daj 'yaj ní', gaa ne tihaa uún nij so' man ní' canoco' ní' nana noco' nij so', rá a nij so' a. ⁵Tzaj ne núj me se a 'ó xco' nii ne cuno núj rihaan nij so' a ma'. 'O se guun rá núj se vaa ve'é ya quinaj nu' se-nana Diose nana ya rihaan soj, rá núj adonj. ⁶Dan me se ase vaa sí uun chij vaa ta'aj nij sí man Jerusalén, rá nii, tzaj ne taj vaj sí sa' doj rihaan tuvi', rá 'unj a ma'. Maan se 'o cuyaan vaa cunudanj yuvii rihaan Diose nanj adonj. Dan me se nij sí uun chij yo' ro', ne cataj xna'anj nij so' a doj nana rihaan 'unj ma'. Maan se cunaj vaa nana ca'mii natáj 'unj, taj nij so' a.

7-8 Dan me se Diose me síi qui'yaj guun nucaj síi cu'naj Pedró nata' so' se-nana Diose nana sa' rihaan nij yuvií israelitá, ne danj qui'yaj guee Diose ga 'unj uún, ne dan me se guun nucaá 'unj nata' 'unj se-nana Diose nana sa' rihaan nij yuvií yaníj, qui'yaj Diose, ne che'é dan me xcaj nij síi uun chij man Jerusalén cuentá se vaa ne cachíin doj nana mán 'unj a. Maan se ase vaa atá síi cu'naj Pedró suun nata' rihaan nij yuvií israelitá, qui'yaj Diose ro', danj vaa atá 'unj suun nata' rihaan nij yuvií yaníj, qui'yaj uún Diose a. ⁹Ne quene'en síi cu'naj Santiagó do', síi cu'naj Pedró do', síi cu'naj Juan do', se vaa qui'yaj ndo'o Diose se luj che'é 'unj do', che'é síi cu'naj Bernabé do', se vaa guun nucaá 'unj nata' 'unj se-nana Diose nana sa' rihaan yuvií, qui'yaj Diose, ne guun ya nu rá nij so' se vaa Diose me síi ca'ne' suun rihaan núj ei. Dan me se síi uun chij rihaan nij síi cuchumán rá ni'yaj man Jesucristó man Jerusalén me nij so', tzaj ne guun ya rá nij so' se vaa tuvi' ma'an nij so' me núj, ne 'o cuyaan vaa suun vaa rihaan núj ga suun vaa rihaan nij so', rá nij so' a. Dan me se ne nata' nij so' se-nana Diose nana sa' rihaan nij yuvií israelitá, ne tananj núj uún, ne nata' núj rihaan nij síi yaníj, cataj nij so' uún a. ¹⁰Tzaj ne orún' ya rasuun me cachíin ni'yaj ndo'o nij so' rihaan núj se vaa asino nij síi nique me raçuíj núj, taj nij so' a. Tzaj ne tumé ndo'o núj man nij síi nique, ne asino yo' me 'yaj núj chéé núj ei.

Nana nihánj taj xna'anj che'é nana cataj xna'anj Pabló rihaan síi cu'naj Pedró, se vaa inanj che'é Jesucristó cunuu sa' ni' rihaan Diose a

¹¹Cachén doj güii, gaa ne cuchi' síi cu'naj Pedró chuman' cu'naj Antioquía a. Tzaj ne qui'yaj so' doj se nij, ne tumé so' cacun' che'é se nij qui'yaj so', rá 'unj, ne che'é dan ca'mii rihaan yaj ga so' rihaan cunudanj yuvií, ne cataj 'unj se vaa tumé so' cacun' che'é se vaa qui'yaj so' a. ¹²Dan me se gaa ca'na' so' chuman' Antioquía, ne xcaj so' cuentá se vaa ca'vee cha so' chraa ga nij yuvií yaníj, ne danj qui'yaj so', ne chá so' chraa ga nij so' chuguanj. Tzaj ne gaa namán nij síi ca'na' suun qui'yaj síi cu'naj Santiagó chuman' nihánj, gaa ne cuchu'vi' Pedró ca'mii nij síi man Jerusalén síi taj se vaa no xcúún cunudanj nij snó'o nocó' man Diose cata' ta'nga' man nij so' a. Dan me se chu'vi' Pedró se vaa xcaj nij so' cuentá se vaa chá so' chraa ga nij yuvií yaníj, ne cataj nij so' se vaa ne nó xcúún so' qui'yaj so' danj, rá so', ne che'é dan me ca'ne' rá so' ga rej chá chraa ga nij yuvií yaníj, ne naxuun yaníj so' man so' rihaan nij yuvií yaníj nanj adonj. ¹³Quene'en ma'an so' se vaa ca'vee cha so' chraa ga nij yuvií yaníj, tzaj ne nuveé sij 'o vaa rá ga nana a'mii me so' a ma'. Ne ase vaa qui'yaj so' ro', ta'nga' danj qui'yaj uún taran' nij yuvií israelitá, ne ndaa síi cu'naj Bernabé qui'yaj cacun' ga nij so' se vaa ca'ne' rá so' ga rej chá chraa ga nij yuvií yaníj nanj adonj.

¹⁴Dan me se xcaj 'uñj cuentá se vaa ne raan noco' nij so' se-nana Diose nana ya ma'. Dan me se ca'mii yá 'uñj rihaan Pedró, ne cuno taran' nij so', ne cataj 'uñj: —Síf israelitá mé so', tzaj ne ne nocó' so' tucuáán noco' nij yuvií israelitá ma'. Maan se ase vaa 'yaj nij yuvií yaníj ro', danj vaa 'yáá so' chuguanj. Me che'é qui'yáá so' fuerzá man nij yuvií yaníj canoco' nij yuvií yaníj tucuáán noco' nij yuvií israelitá ga. ¹⁵Dan me se yuvií israelitá me ní' á. Nuveé yuvií yaníj yuvií 'yaj ndo'o cacun' me ní' ma'. ¹⁶Tzaj ne ne'en ní' se vaa nda' se ve'é noco' yo'o so' se-tucuanj Moisés, tzaj ne se cunuu sa' ma'an so' rihaan Diose ma'. 'O se cunuu sa' ya so' rihaan Diose sese cuchuman rá so' ni'yaj so' man Jesucristó adonj. Dan me se cuchumán rá ma'an ní' ni'yaj ní' Jesucristó, yan cunuu sa' ní' rihaan Diose, tzaj ne se cunuu sa' ní', qui'yaj se-tucuanj Moisés ma'. Inanj danj taj danj Diose á. A 'ó yuvií se cunuu sa' rihaan Diose qui'yaj se-tucuanj Moisés ma', taj uún danj Diose adonj. ¹⁷'O se ní' me se canoco' ní' man Jesucristó, gaa ne ca'vee x'nee cacun' xráá ní' qui'yaj so', rá ní', tzaj ne 'o se veé danj 'yaj ní' cacun' ta' rasuun chihá'. Me che'é 'yaj ní' danj ga. 'O se Cristó me síf ca'ne' suun qui'yaj ní' cacun', rá so' na'. Taj ma'. —Nu' nana nihánj me nana ca'mii 'uñj rihaan síf cu'naj Pedró adonj.

¹⁸Dan me se ma'an 'uñj me síf tiri' chrej canoco' se-tucuanj Moisés, ne veé dan, gaa ne sese guun che'e uún 'uñj naqui'yaj sa' uún 'uñj

man chrej yo', ne dan me se ma'an inanj yá 'uñj me síf tumé cacun' gaa nanj adonj. ¹⁹Asij rque me se canoco' 'uñj tucuáán yo', tzaj ne quiri' rá 'uñj, qui'yaj tucuáán yo', ne yaj me se ase vaa cavi' Jesucristó rihaan rcutze ro', danj vaa cavi' 'uñj rihaan tucuáán yo' chuguanj. Ne yaj me se inanj che'é Diose gaa i'na' 'uñj ei. ²⁰Che'é se amán rá 'uñj ni'yaj 'uñj Jesucristó ro', maan che'é dan vaa i'na' 'uñj ei. Yaj me se nuvé 'uñj me síf yanj cuano ma'. 'O se Jesucristó me síf yanj nimanj, ne che'é dan vaa i'na' 'uñj cuano ei. Che'é se amán rá 'uñj ni'yaj 'uñj man ta'níi Diose ro', che'é dan inanj nocó' 'uñj man so' gaa chéé 'uñj rihaan chumii nihánj adonj. Ne dan me se maan che'é se cunuu ee uxrá rá so' mán 'uñj ro', che'é dan ca'ne' guee rá so' cavi' so' rihaan rcutze che'é 'uñj nanj adonj. ²¹Ne na'vej rá 'uñj tanáj yaníj 'uñj se luj qui'yaj Diose che'é 'uñj ma'. 'O se vaa che'é ya qui'yaj Diose se luj adonj. Dan me se sese ca'vee ya navij cacun' che'é qui'yaj se-tucuanj Moisés, gaa ne cavi' uun ma'an Jesucristó vaa gaa aj na'. Taj ma'. 'O se ne cavi' uun so' mei.

Nana nihánj taj xna'anj se vaa inanj che'é se amán rá ní' ni'yaj ní' man Jesucristó, che'é dan yanj Nimán Diose ga ní' a

3 Síf nij snúu rma'an ya me soj sij man estadó Galicia nanj chuguanj. Me che'é guun rá soj tanáj soj tucuáán sa' ga. Vaa síf qui'yaj chree man soj na'. Nuveé se sa' uxrá nata' nii rihaan soj se vaa cavi' Jesucristó rihaan rcutze che'é

soj á. ²O se me rá 'unj xna'anj 'unj 'o nana man soj chuguanj. Che'é se canoco' nij soj se-tucuanj Moisés me yáan Nimán Diose ga soj na'. Ase che'é se amán rá soj cuno soj se-nana Jesucristó me yáan Nimán Diose ga soj xa'. ³O se síi nij snúu rma'an ya me soj nanj chuguanj. Gaa guun che'e soj canoco' soj man Jesucristó, ne guun nucuaj rá soj man Nimán Diose se vaa racuíj Nimán Diose man soj, tzaj ne yaj me se nucuaj rá soj man ma'an soj se vaa cunu sa' soj qui'yaj ma'an soj nanj ason. ⁴Nu' se sa' qui'yaj Diose che'é soj gaa canoco' naca soj man Jesucristó ro', taj yu'vee nó yo', qui'yaj soj a a' man ason. Ya ya aj na'. Ne cuchuman ya raj se vaa qui'yaj soj a mei. ⁵Gaa rqué Diose Nimán so' rihaan soj qui'yaj ndo'o soj rasuun sa', gaa ne me che'é qui'yaj Diose danj, rá soj ga. Che'e se canoco' soj se-tucuanj Moisés me qui'yaj Diose danj na'. Taj mei. Dan me se che'é se amán rá soj ni'yaj soj man Jesucristó me qui'yaj Diose danj chuguanj.

⁶Dan me se ase vaa qui'yaj síi cu'naj Abraham síi cayáan gaa naá ro', inanj danj qui'yaj soj ei. Dan me se síi cu'naj Abraham ro', me se cuchumán rá so' ni'yaj so' Diose, ne che'é dan cataj Diose se vaa sij sa' me Abraham, ne cunu sa' so' rihaan Diose á. Inanj danj a'mii danj Diose adonj. ⁷Che'é dan xcaj soj cuentá se vaa ní' sij amán rá ni'yaj man Diose me se ase vaa síi cu'naj Abraham ro', ta'nga' danj vaa ma'an ní' chuguanj.

⁸Dan me se gaa naá ne'en Diose se vaa cuchuman rá nij yuvií yaníj

ni'yaj nij so' man Diose, ne ne'en Diose se vaa cunu sa' nij so' rihaan Diose, qui'yaj ma'an Diose, ne che'é dan me nata' Diose se-nana Diose nana sa' rihaan Abraham, cataj Diose:

—Che'é se vaa qui'yáa so' ro', che'é dan me qui'yáa 'unj se luj che'é taran' nij yuvií yaníj adonj — taj Diose rihaan síi cu'naj Abraham asij taj vaj a 'ó yuvií ne'en se-nana Diose nana sa', ne nu' nana yo' nana ca'mii Diose rihaan síi cu'naj Abraham ro', canó nana yo' rihaan danj Diose a.

⁹Dan me se cuchumán rá Abraham ni'yaj so' Diose, ne qui'yaj Diose se luj che'é so', ne ase vaa qui'yaj Diose che'é síi cu'naj Abraham ro', danj qui'yaj uún Diose che'é taran' nij síi cuchuman rá ni'yaj man so', ne qui'yaj uún Diose se luj che'é nij so' adonj.

Nana nihánj taj xna'anj se vaa se ca'vee cunu sa' ní' rihaan Diose, qui'yaj se-tucuanj Moisés a ma'

¹⁰Tzaj ne a'mii uún danj Diose che'é yuvií nucuaj rá man se-tucuanj Moisés, taj yo': “Sese se qui'yaj yo'o so' cunudanj nij nana no rihaan danj Diose nana cataj xna'anj Moisés ro', ne so' me síi cachran' xna'anj ni'yaj rihaan Diose á”, taj danj Diose, ne a 'ó yuvií se guun nucuaj qui'yaj nu' se-tucuanj Moisés a ma'. Che'é dan me taran' nij yuvií nucuaj rá man se-tucuanj Moisés ro', quiran' nij so' sayuun, qui'yaj Diose adonj. ¹¹Tzaj ne: “Síi amán rá ni'yaj man Diose ro', me se cunu sa' so' rihaan Diose, ne cayáan so' ga Diose nu' cavii nu' ca'anj a”, taj uún danj Diose, ne che'é dan me ne'en ní'

se vaa inanj nij yuvii amán rá ni'yaj man Diose me yuvii cunu sa' rihaan Diose á. Se cunu sa' nij yuvii nucuaj rá man se-tucuanj Moisés ma'. ¹²Dan me se xa' se-tucuanj Moisés, tzaj ne ne che'e yan cuchuman rá' me nani' rihaan sayuun ma'. Maan che'é yan qui'yá' nu' rasuun taj tucuáan yo' me nani' rihaan sayuun, taj se-tucuanj Moisés nanj adonj.

¹³Dan me se gaa naá me se ne guun nucuaj ní' qui'yaj ní' nu' se-tucuanj Moisés ma'. Che'é dan me sij cachran' xna'anj ni'yaj me ya ní' gaa rque, tzaj ne cavi' Jesucristó rihaan rcutze che'é ní', ne guun so' síf cachran' xna'anj ni'yaj che'é ní', ne che'é dan se quiran' ma'an ní' sayuun daj chihaa mÍj a man chuguanj. "Síf aj noco' rihaan rcutze me síf cachran' xna'anj ni'yaj rihaan Diose", taj danj Diose á. Dan me se guun Jesucristó 'o síf cata se-cacun' cunudanj ní' nago' so' nu' nij cacun' yo' rihaan rcutze, ne cuano nihánj me se síf vaa uun xráa me ní' cuano ei. ¹⁴Ndaa sij, gaa ne se luj cata' tu'va Diose rihaan síf cu'naj Abraham ro', ca'na' se luj yo' ndaa rihaan nij yuvii yanÍj, che'é se vaa qui'yaj Jesucristó a. Dan me se gaa naá, ne cata' tu'va Diose se vaa catuu Nimán Diose nimán ní', ne cuchumán rá ní' ni'yaj ní' man Diose, ne che'é dan catúj ya Nimán Diose nimán taran' ní' cuano ei.

Nana nihánj taj xna'anj se vaa cata' tu'va Diose rihaan síf cu'naj Abraham cataj Diose se vaa rque ndo'o Diose se sa' rihaan nij ta'níí ta'nij si'no Abraham a

¹⁵Ne ca'mii 'unj che'é ndaa vaa 'yaj nij síf man rihaan yo'óo

nihánj, tinuj, nocoj. Sese vaa vij roj so' numÍj nana, ne asa' quisÍj numÍj roj so' nana, gaa ne naxcaj roj so' 'o yanj a'mii che'é ndaa vaa qui'yaj roj so', gaa ne dan me se ndaa vaa taj yanj naxcaj roj so' ro', 'yaj roj so' a. Se guun ca'ne' rá roj so' ma'. ¹⁶Ne dan me se ta'nga' danj qui'yaj guee Diose ga síf cu'naj Abraham, ne dan me se cunumÍj roj so' nana ndaa vaa qui'yaj Diose ga síf cu'naj Abraham a. Dan me se cataj Diose se vaa cavii sa' so' do', cavii sa' ta'níí ta'nij si'no so' do' a. (Dan me se danj a'mii danj Diose, tzaj ne ne cataj Diose se vaa cavii sa' que'ee ta'níí ta'nij si'no síf cu'naj Abraham ma'. 'O se che'é orún' ta'níí ta'nij si'no síf cu'naj Abraham ca'mii danj Diose adonj. Ne síf cu'naj Jesucristó me síf cavii sa' nanj adonj.)

¹⁷Ne inanj nihánj me nana me rá 'unj cataj xna'anj 'unj rihaan soj ei. Dan me se Diose cataj rihaan síf cu'naj Abraham daj qui'yaj Diose che'é Abraham do', che'é ta'níí ta'nij si'no Abraham do', ne cachén yo'ó ca'anj cientó táa yo'ó icó chi' yo', gaa ne rque Diose se-tucuanj Moisés, tzaj ne ne quiri' nana cata' tu'va Diose qui'yaj Diose che'é síf cu'naj Abraham qui'yaj se-tucuanj Moisés ma'. 'O se ya qui'yaj so' ndaa vaa cataj so' adonj. ¹⁸Dan me se sese che'e se-tucuanj Moisés me rque Diose rasuun sa', gaa ne nuveé che'e yan cata' tu'va so' rque so' rasuun sa' asij naá me yo' gaa a ma'. Maan se ca'mii uun so' vaa gaa nanj adonj. Tzaj ne sese inanj nij síf noco' se-tucuanj Moisés me síf nıcaj nij rasuun sa' yo', gaa

ne taj yu'vee nó nana cata' tu'va Diose rihaan Abraham gaa naá vaa gaa a ma'. Tzaj ne ne vaa danj a ma'. 'O se che'é nana ca'mii Diose rihaan Abraham me nicaj ní' nij rasuun sa' ei. Dan me se quirí' uun ní' nu' nij rasuun sa' yo', qui'yaj Abraham chuguanj. Ne a doj sa'anj ne curu'vee ní' che'é nu' rasuun sa' yo' a ma'.

Nana nihánj taj xna'anj se vaa rqué Diose se-tucuanj Moisés che'é yan xcaj yuvii cuentá se vaa síf tumé ndo'o cacun' me yuvii a

¹⁹Dan me se sese danj vaa, gaa ne me che'é rqué Diose se-tucuanj Moisés, rá soj ga. Rqué Diose tucuáán yo' rihaan Moisés che'é cacun' tumé yuvii, ne me rá Diose canoco' yuvii tucuáán yo' ndaa se ca'na' ta'níí ta'nij si'no Abraham síf cu'naj Jesucristó rihaan chumii nihánj, gaa ne so' ro', me síf rque nu' nij rasuun sa' rihaan yuvii, ndaa vaa cataj Diose rihaan síf cu'naj Abraham gaa naá ei. Dan me se guun rá Diose se vaa gaa ca'na' Jesucristó, ne ca'ne' rá yuvii ga se-tucuanj Moisés yo' adonj. Tzaj ne se-mozó Diose me nij síf cataj xna'anj tucuáán yo' rihaan síf cu'naj Moisés, gaa ne cataj xna'anj so' tucuáán yo' rihaan nij yuvii a. Dan me se cataj xna'anj Moisés rihaan nij yuvii, ²⁰tzaj ne gaa ca'mii Diose rihaan síf cu'naj Abraham, ne ma'an ya so' ca'mii adonj. Taj vaj síf ca'mii che'é Diose ma'. Taj vaj síf cataj xna'anj rihaan Diose daj me rá síf cu'naj Abraham ma'. Maan se ma'an ya so' me síf ca'mii ga síf cu'naj Abraham, ése orún' ya so' me Diose nanj adonj.

²¹Tzaj ne taj ri'yunj se-tucuanj Moisés man nana cata' tu'va Diose rihaan Abraham gaa naá, rá soj na'. Daj chihaa mój ne vaa danj ma'. Tzaj ne sese guun nucuaj yuvii qui'yaj yuvii 'o tucuáán rqué Diose, ne ya cunu sa' yuvii rihaan Diose, qui'yaj tucuáán yo' ei. Tzaj ne se guun nucuaj yuvii qui'yaj yuvii tucuáán vaa danj ma'. ²²Che'é dan me taj danj Diose se vaa cunudanj yuvii tumé ndo'o cacun' nanj adonj. Inanj danj vaa tumé taran' yuvii cacun', taj danj Diose, ne che'é dan me nana cata' tu'va Diose rihaan síf cu'naj Abraham ro', quisij ya nu' nana yo' che'é taran' ní' sij amán rá ni'yaj man Jesucristó adonj.

Nana nihánj taj xna'anj se vaa gaa ca'na' Jesucristó, ne taj che'é canoco' ní' se-tucuanj Moisés a man adonj

²³Tzaj ne gaa ataa doj quisij güii cuchuman rá ní' ni'yaj ní' man Jesucristó, ne inanj se-tucuanj Moisés canoco' ní', ne ase vaa 'o síf tumé man ní' ro', danj vaa se-tucuanj Moisés rihaan ní' gaa rque ei. Inanj se-tucuanj Moisés vaa rihaan ní' canoco' ní' ndaa se ca'na' güii tihaan Diose rihaan ní' se vaa cuchuman rá ní' ni'yaj ní' man Jesucristó a. ²⁴Dan me se ase vaa síf tumé man xnii daj qui'yaj xnii ro', ta'nga' danj vaa se-tucuanj Moisés rihaan ní' gaa rque, cutumé yo' man ní' ndaa se ca'na' Jesucristó ei. Ndaa síj, gaa ne no' xcúún ní' cuchuman rá ní' ni'yaj ní' man so', ne ca'vee cunu sa' ní' rihaan Diose adonj. ²⁵Cuano ro', nihánj me se aj cuchuman rá ní' ni'yaj ní' man Jesucristó, ne che'é

dan me taj che'é tumé se-tucuanj Moisés man ní' a ma'.

²⁶Che'é se amán rá nij soj ni'yaj soj man Jesucristó ro', che'é dan ta'níí Diose me taran' soj cuano nanj adonj. ²⁷Dan me se che'é se cata' ne soj che'é Jesucristó ro', che'é dan me ase vaa Jesucristó ro', ta'nga' danj vaa soj cuano nanj ei. ²⁸Ne se cataj soj se vaa ta'aj soj me yuvií israelitá ne yo'ó ta'aj soj me yuvií yanj ma'. Ne se cataj soj se vaa ta'aj soj me mozó ne yo'ó ta'aj soj, nuveé sij uun mozó me yo'ó ta'aj soj, cataj soj ma'. Ne se cataj soj se vaa ta'aj soj me snó'o ne yo'ó ta'aj soj me chana ma'. 'O se tananj ase vaa orún' yuvií vaa taran' soj, ne 'o cyaan vaa taran' soj che'é se noco' soj man Jesucristó nanj ei. ²⁹Che'é se sij noco' man Jesucristó me soj ro', che'é dan ma'an ya ta'níí ta'nij si'no síí cu'naj Abraham me soj rihaan Diose, ndaa vaa cataj Diose rihaan síí cu'naj Abraham se vaa rque so' rasuun sa' rihaan taran' nij ta'níí ta'nij si'no síí cu'naj Abraham adonj.

4 Ne ne'en soj daj vaa xnii, se vaa vaa güii, ne guun si'yaj xnii nu' rasuun man tucua' rej xnii ei. Tzaj ne gaa xnii me so', ne ase vaa mozó ro', danj vaa so' tucua' rej so' gaa yaán rej so' ei. ²Dan me se vaa yuvií tumé man xnii daj qui'yaj xnii, ne inanj danj vaa tumé nii man xnii ndaa se cachij ya xnii, gaa ne vaa güii ca'vej rá rej xnii quita'aa xnii rasuun man tucua' xnii ei. ³Ne ase vaa xnii ataa cachij ro', ta'nga' danj vaa ma'an ní' gaa rque, ne inanj ne'en ní' canoco' ní' man nij ya'anj uun chij rihaan chumií nihánj a.

⁴Tzaj ne quisíj güii me rá Diose rque Diose nu' se sa' rihaan ní', ne che'é dan ca'neé Diose ta'níí so' ca'na' ta'níí so' rihaan chumií nihánj, ne cuchruj 'o chana man ta'níí Diose, ne síí noco' se-tucuanj Moisés me nu' nij tuví' so' gaa cayáan so' rihaan chumií nihánj adonj. ⁵Dan me se me rá Jesucristó racuíj so' man taran' ní' sij noco' tucuaán noco' yuvií man rihaan chumií nihánj, se vaa ca'vee tanáj ní' tucuaán noco' yuvií man rihaan chumií, ne nıcaj ní' nu' se sa' me rá Diose rque Diose rihaan ta'níí Diose ei. Ne danj me rá Jesucristó qui'yaj so' che'é ní' chuguanj. ⁶Cuano nihánj me se ta'níí Diose me nij soj ei. Che'é dan ca'neé Diose man Nimán ta'níí so' nimán ní', ne che'é dan me: "Ataj chij. Rej núj mé so' á", taj ní', aguáj ní', 'yaj Nimán ta'níí so' ei. ⁷Che'é dan me nuveé mozó me soj rihaan Diose cuano nihánj ma'. Ase vaa mozó vaa soj gaa rque, tzaj ne xa' yaj, nahuun soj ta'níí Diose, ne vaa güii nacaj soj nu' se sa' rque Diose rihaan nij ta'níí so' adonj.

Nana nihánj taj xna'anj se vaa ne nó xcúun ní' qui'yaj ní' tucuaán noco' yuvií man rihaan chumií nihánj cuano mei

⁸Gaa rque me se ne ne'en ya soj daj vaa Diose ma'. Che'é dan me qui'yaj suun soj rihaan ya'anj uun chij rihaan rasuun man rihaan chumií nihánj, tzaj ne nuveé ya'anj ya me nij ya'anj qui'yaj suun soj rihaan ma'. ⁹Tzaj ne cuano nihánj me se ne'en nij soj man ma'an ya Diose ei. Tzaj ne sa' doj cataj

'un̄j se vaa ne'en Diose man nij soj chuguan̄j. Sese āj ne'en soj man ma'an̄ ya Diose, gaa ne me che'é canicaj uún soj canoco' soj man nij ya'an̄j uun chij rihaan rasuun man rihaan chumij nihánj ga. Ne'en soj se vaa se guun nucuaj nij so' racúj nij so' man soj ma'. Taj yu'vee a 'ó xco' nó ma'an̄ nij so' ma'. Me che'é me rá uún soj qui'yaj suun soj rihaan nij so' ga. ¹⁰Ne navij rá soj güii guee do', navij rá soj cha'an̄j che'é 'o 'o yavii do', vaa dió guee rihaan soj do', vaa yo' guee rihaan soj do' ga. Me che'é 'yaj soj dan̄j ga. ¹¹Nanó ndo'o rá 'un̄j se vaa 'yaj soj, ne nanó rá 'un̄j se vaa quirí' rma'an̄ nu' suun qui'yaj suun 'un̄j tucu'yón 'un̄j se-nana Diose nana sa' man nij soj nan̄j chuguan̄j.

**Nana nihánj taj xna'an̄j se
vaa nanó rá Pabló che'é se
tanáj nij síi man Galacia nana
tucu'yón so' man nij so' a**

¹²Ase vaa 'un̄j ro', dan̄j gaa guee soj, ése ndaa adi' se vaa soj ro', dan̄j vaa guee 'un̄j, tinuj, nocoj. Che'é dan me daj se 'yaj guej cuano ro', dan̄j qui'yaj guee soj ei. Nuveé che'e se qui'yaj chi'ii soj manj ma'. Tanan̄j a, ne inan̄j ve'é qui'yaj soj gaa cayáan 'un̄j ga soj ei. ¹³Aj ne'en soj se vaa che'é se canó chi'ii manj, che'é dan natá' 'un̄j se-nana Diose nana sa' rihaan soj gaa asino yaan̄ ei. ¹⁴Ne gaa quirán' 'un̄j rihaan soj me se ne nachri' soj ni'yaj soj manj ma'. Tanan̄j a, ne caráya'an̄j ndo'o soj ni'yaj soj manj, ne ndaa adi' ve'é 'yaj nii ga 'o se-mozó Diose ro', dan̄j qui'yaj soj, gaa ne ve'é ndo'o ca'mii soj gaj ei.

Ne ase vaa ma'an̄ ya Jesucristó ro', ta'nga' dan̄j vaa 'un̄j, rá soj, ¹⁵ne che'é dan me guun niha' uxrá rá nij soj ne ve'é uxrá cuno soj nana ca'mij, ne cunuu 'ee uxrá rá soj manj nan̄j adon̄j. Dan me se cataj yá' ta' asuun, ne sese guun nucuaj nij soj quirii soj rlii rihaan soj cunuú yo' rihan̄j, ne ca'vej rá soj qui'yaj soj dan̄j, nda' rasuun nan̄j chuguan̄j. Tzaj ne yaj me se me che'é ne niha' rá soj gaa uno soj nana a'mij cuano ga. ¹⁶Maan che'é se ca'mij nana ya ya rihaan soj, che'é dan mej síi taj ri'yun̄j man soj, rá soj nan̄j na'. Taj ma'.

¹⁷Dan me se aráya'an̄j uxrá yo'ó nij so' man soj, tzaj ne ne cunaj daj chihaa míj 'yaj nij so' ma'. Maan se me rá nij so' tanáj xco soj nana noco' ní' sij amán rá ni'yaj man Jesucristó, ne inan̄j ma'an̄ nij so' canoco' soj, rá nij so' nan̄j adon̄j. ¹⁸Sese ve'é 'yaj yuvii ga soj, ne cunaj uxrá sese caraya'an̄j nij yuvii man soj, rá 'un̄j á. Tzaj ne yo'ó dan̄j qui'yaj nij so', sese ya me sa' rá nij so' ni'yaj nij so' man nij soj ei. Tzaj ne taj ma'. Me che'é gaa yaán 'un̄j ga soj, gaa ne uun che'e nij so' 'yaj nij so' se sa' ga soj ga. Nuveé se sa' 'yaj nij so' ga soj man chuguan̄j. ¹⁹Dan me se ase vaa ta'ní' 'un̄j ne'ej ro', dan̄j vaa nij soj, tinuj, nocoj. Cuano nihánj me se uun che'e uún 'un̄j nanó ndo'o raj che'é soj ndaa vaa nanó raj gaa rque, ne me rá 'un̄j se vaa nari' sa' ya soj se-nana Diose nana sa' ya ei. Dan me se ase vaa nanó rá chana nichrun' cuchruj ne'ej che'é se ne ne'en no' sese ca'ngaa sa' ta'ní' no' ro', dan̄j vaa nanó rá 'un̄j che'é soj

cuano chuguanj. Ne veé inanj danj nanó ndo'o rá uún 'unj che'é nij soj ndaa nari' ya ya soj ndaa vaa qui'yaj ma'an ya Jesucristó nanj ei. ²⁰'O se 'vee, ne ndaa cuano cayáan ya 'unj ga soj, gaa ne ca'mii ma'an ya 'unj ga soj, raj ei. Tzaj ne ne ne'en yaj daj nano raj che'é soj a mei.

Nana nihánj taj xna'anj se vaa sese noco' ní' se-tucuanj Moisés, ne mozó me ní', ne ne nó xcúun ní' qui'yaj ní' danj a ma'

²¹Me rá 'unj cataj ya soj 'o nana rihanj ei. Me rá nij soj canoco' soj se-tucuanj Moisés, tzaj ne ne'en soj daj taj nana cachrón Moisés rihaan yanj yo' na'. ²²Dan me se cachrón Moisés nana nihánj rihaan yanj, se vaa vaa vj ta'níí sít cu'naj Abraham sno'o cunii, ne yo'o ta'níí so' me ne'ej cuchruj mozó chana nuu rihaan so', ne yo'ó ta'níí so' me ne'ej cuchruj ma'an nica so' a. Xa' nica so', tzaj ne nuveé mozó me chana nica so' ma'. Nica ya so' me yo' adonj. ²³Dan me se ne'ej cuchruj mozó chana ro', me se ase vaa a'ngaa naj guun ne'ej ro', danj vaa ca'ngaa so' a. Tzaj ne xa' ne'ej cuchruj ma'an nica Abraham, tzaj ne aj cata' tu'va Diose daj qui'yaj Diose che'é so' asij gaa ataa ca'ngaa so' a.

²⁴⁻²⁵Ne ase vaa cuentó che'é roj chana cuchruj ne'ej ro', danj vaa yo'ó nana tucuyón ní', rá 'unj, ne ase vaa roj chana ro', danj vaa vj nana cataj xna'anj Diose rihaan yuvií a. Dan me se yo'o chana me se-mozó Abraham, ne Agar cu'naj se-chuvií no', ne ase vaa mozó chana cu'naj Agar ro', ta'nga' danj

vaa nana cataj xna'anj Diose rihaan sít cu'naj Moisés gaa ca'mii Diose ga Moisés xráá quij xcaan cu'naj Sinaí a. Se-tucuanj Moisés me nana yo', ne ase vaa mozó ro', danj vaa yuvií noco' nana yo' a. Nicun' quij xcaan cu'naj Sinaí rej cu'naj Arabia, tzaj ne ase vaa chana cu'naj Agar ro', ta'nga' danj vaa nij yuvií man chuman' Jerusalén cuano a. Dan me se taran' nij yuvií man chuman' Jerusalén me yuvií israelitá yuvií noco' se-tucuanj Moisés, ne ase vaa mozó ro', danj vaa taran' nij so' nanj ei. ²⁶Tzaj ne sít man yo'ó chuman' Jerusalén chuman' naj rej xta' me ní', ne nuveé mozó me ní' ma'. 'O se aj guun nii ní' man chuman' Jerusalén naj rej xta' adonj.

²⁷Nihánj me nana no rihaan danj Diose a: "Gaa niha' nimán so', chana ituun á. Ataa cuchruj so' ne'ej, tzaj ne gaa niha' uxrá nimán so' á. 'O ruún so' cuano, tzaj ne vaa güii, ne doj a gaa ta'níí so' rihaan ta'níí chana otoj ga sno'o adonj". Inanj danj a'mii danj Diose che'é nica Abraham chana cuchruj man sít cu'naj Isaac a.

²⁸Ne ase vaa ta'níí no' sít cu'naj Isaac ro', ta'nga' danj vaa nij soj, tinuj, nocoj. Soj me ne'ej se vaa cataj ya Diose ca'ngaa ya ei. Ne ase vaa cavii sa' sít cu'naj Isaac ro', danj cavii sa' soj uún ei. ²⁹Ne'en nij soj se vaa xnii ca'ngaa ma'an ta'níí yo'ó chana ro', me se taj ri'yunj ndo'o so' man ne'ej tucua ya ve' chuguanj. Dan me se ta'nga' danj ran' guee ní' cuano nihánj, ne dan me se 'yaj ndo'o nij yuvií noco' ma'an se-tucuanj Moisés sayuun

man ní' sji cunuu sa' nimán che'é Nimán Diose chuguanj.

³⁰Tzaj ne xcaj ní' cuentá me taj danj Diose ei. Dan me se taj yo' se vaa: "Quirii so' man roj ta'nij mozó chana ca'anj yaníj roj ta'nij no' á. 'O se orún' ta'níi nica so' níi ne uun mozó me síi guun síi si'yaj nu' si'yáa so' vaa güii ei. Ne xa' ta'níi chana uun mozó, tzaj ne daj chihaa míj ne nó xcúún ta'níi mozó chana yo' quirí' yo' ta'aj si'yáa so' ma'". Dan me se danj vaa nana ca'mii Diose rihaan Abraham nana no rihaan danj Diose a. ³¹Dan me se nuveé ta'nij mozó chana me ní', man tinuj, man nocoj. Nuveé yuvii 'yaj suun ndo'o canoco' se-tucuanj Moisés me ní' ma'. Maan se ase vaa ta'níi chana ne uun mozó ro', danj vaa ní', ne a 'ó tucuaán ne nó xcúún ní' canoco' ní' a ma'.

5 Maan se aj ca'néj Jesucristó nu' suun taj xraá ní', ne che'é dan vaa ya'núj rihaan ní' canoco' ní' man Diose cuano ei. Che'é dan me ca'nej nucuaj soj nimán soj, ne se ca'vej uún soj qui'yaj suun soj suun uun mozó a ma'. Se guun rá soj canoco' soj nu' se-tucuanj Moisés a ma'.

Nana nihánj taj xna'anj se vaa taj che'é cuta' nii ta'nga' man nee man ní' ma'

²Xcaj nij soj cuentá se vaa nihánj me nana taj xna'anj ma'án 'unj sij cu'naj Pabló rihaan soj ei. Dan me se sese cuta' nii ta'nga' man soj, ne taj yu'vee nó Jesucristó rihaan soj vaa gaa a ma'. ³Nihánj me cataj xna'anj uún 'unj rihaan soj se vaa taran' nij snó'o a'vej rá

cuta' nii ta'nga' man ro', no xcúún nij so' canoco' nij so' nu' se-tucuanj Moisés adonj. ⁴Ta'aj nij soj me rá canoco' se-tucuanj Moisés, ne cunuu sa' nij so' rihaan Diose, rá nij so', tzaj ne nuveé sij noco' man Jesucristó me síi 'yaj danj ma'. 'O se síi tanáj xco se luj qui'yaj Diose che'é ní' me nij so' adonj. ⁵Xa' ní', tzaj ne nuu Nimán Diose nimán ní', ne amán rá ní' ni'yaj ní' man Jesucristó, ne che'é dan me guun ya rá ní' se vaa vaa güii cunuu sa' ní' rihaan Diose, ne yo'o na'vij ní' ndaa se quisij ya güii yo' adonj. ⁶Xa' ní' sij noco' man Jesucristó me se taj se 'yaj sese quitaj ta'nga' man ní', taj se 'yaj sese se quitáa ta'nga' man ní', taj se 'yaj ma'. 'O se amán rá ní' ni'yaj ní' man Jesucristó, ne che'é dan cunuu lee rá ní' ni'yaj ní' man tinúú ní', ne che'é roj yo' me cavii sa' ní' adonj.

⁷Gaa rque me se aj sa' uxrá noco' soj man Diose tzaj niha'. Me síi caráán chrej rihaan soj se cuchumán rá soj cuno soj nana ya yaj ga. ⁸Xa' nana uno soj cuano, tzaj ne nuveé Diose me síi ca'mii nana yo' rihaan soj ma'. Dan me se xa' Diose, tzaj ne yo'o canacúún so' man soj canoco' soj man orún' ya so' adonj. ⁹Ne'en nij soj se vaa yo'óo cu'naj levadura se 'yaj namij rque rachrúún, me se doj tzin' yo' araa nii rque cunj, tzaj ne namij rque cunudanj cunj, 'yaj yo', ne ase vaa yo'óo cu'naj levadura ro', ta'nga' danj vaa nana ne uno soj adonj. Dan me se doj tzin' nana ne uno soj, tzaj ne ca'anj ni'ya que'ee nij soj, qui'yaj nana ne yo' ei. ¹⁰Dan me se 'unj me se yo'o amán raj ni'yaj 'unj man síi 'nij ra'a man

ní' se vaa yo'o cuyaan gaa rá soj ga 'unj chuguanj. Ne sí' a'mii yo'ó nana ro', tzaj ne 'yaj chruj so' rihaan soj se vaa se canoco' sa' soj man Diose chuguanj. Che'é yan 'yaj so' danj ro', che'é dan quiran' so' sayuun, qui'yaj Diose nanj adonj. Me ma'an sij me so', tzaj ne ya quiran' so' sayuun, qui'yaj Diose ei.

¹¹A'mii natáj ma'an 'unj rihaan yuvii se vaa cuta' nii ta'nga' man yuvii, rá soj na'. Taj, man tinuj, man nocoj. Sese danj vaa nana a'mii natáj 'unj, ne ne guun na'aj yuvii cunō yuvii nana se vaa cavi' Jesucristó rihaan rcutze asuun saj ma'. Tzaj ne guun na'aj nij yuvii ei. Ne maan che'é dan 'yaj ndo'o nij yuvii sayuun manj adonj. ¹²Dan me se vaa che'é cataj ní' se vaa nij sí' 'yaj sayuun man soj ro', 'o se veé, ne vaa che'é ca'ne' nij so' nu' nee man ma'an nij so' vaa tzaj adonj.

Nana nihánj taj xna'anj se vaa ve'é qui'yaj ní' nu' se vaa me rá Nimán Diose qui'yaj ní' á

¹³Dan me se canacúun Diose man nij soj guun niha' nimán soj canoco' soj man so', tinuj, nocoj. Tzaj ne se guun rá soj se vaa ca'vee qui'yaj soj náá guun se me rá nee man ma'an soj qui'yaj soj ma'. Tananj cunu 'ee rá soj tinúu soj, ne yo'o qui'yaj suun soj che'é tinúu soj ei. ¹⁴Dan me se 'o cuyaan ya vaa nu' se-tucuanj Moisés ga orún' nana nihánj chuguanj: "Adi' se 'ee rá so' man ma'an so' ro', ta'nga' danj gaa 'ee rá so' man yo'ó yuvii á". Ne nihánj me nana nō xcúun ní' cunō ní', ne sese danj qui'yaj ní', ne sí' 'yaj nu'

se-tucuanj Moisés me ya ní' adonj. ¹⁵A 'ó nana se cachiin cunō uún ní', sese danj qui'yaj ní' a ma'. Tzaj ne sese cunū' soj do', sese guun xcoj ruvaa rá soj ni'yaj soj tuvi' soj do', sese qui'yaj soj sayuun man tuvi' soj do', ne dan me se tadó uxrá soj ei. 'O se sese danj uun rá soj, ne quirí' cunudanj tuvi' soj, qui'yaj soj nanj chuguanj.

¹⁶Ne cataj xna'anj 'unj rihaan soj se vaa yo'o cunō soj a'mii Nimán Diose gaa chéé soj rihaan chumii nihánj, ne sese inanj danj qui'yaj soj, ne daj chihaa mǐj se guun qui'yaj soj se vaa me rá nee man ma'an soj qui'yaj soj ma'. ¹⁷Dan me se inō uxrá vaa se me rá nee man ní' qui'yaj yo' ga se me rá Nimán Diose qui'yaj yo' ei. Dan me se inō me rá 'o 'o roj yo' ei. Sese me rá ní' cunō ní' rihaan Nimán Diose, ne aráan nee man ní' chrej rihaan ní' cunō ní' rihaan Diose chuguanj. Ne sese me rá ní' qui'yaj ní' se nij me rá nee man ní' qui'yaj yo', ne aráan Nimán Diose chrej rihaan ní' se qui'yaj ní' danj ma'. Ne unu' Nimán Diose ga nee man ní', ne ca'vee se me rá ní' qui'yaj ní' ndaa vaa me rá ma'an ní' qui'yaj ní', tzaj ne se guun nucuj ní' qui'yaj ní' danj a man adonj. ¹⁸Tzaj ne sese noco' soj man Nimán Diose, ne taj che'é canoco' soj se-tucuanj Moisés a mei.

¹⁹Dan me se aj ne'en soj daj vaa rasuun me rá nee man ma'an soj qui'yaj yo' ei. Me rá yo' qui'yaj yo' cacun' ga yo'ó chana do', me rá yo' qui'yaj yo' se nij ndo'o do', me rá yo' qui'yaj yo' se na'aj ndo'o do', ²⁰quina'vij soj rihaan ya'anj acóy yuvii do', me rá uún yo' ca'mii soj

ga síi chruun nano' so' chrej che'é soj do', uun xcoj ruvaa rá soj ni'yaj soj tinúu soj do', unu' soj ga tinúu soj do', axríj yuvaa soj man tinúu soj do', inanj me rá 'o 'o soj cavií sa' uún soj do', uuxra' ta'aj nij soj man nij soj do', ²¹uun xcoj ruvaa rá soj ni'yaj soj tinúu soj do', achráá ndo'o soj chra' xnó ga tuvi' soj do', ne dan me se que'ee doj tuvi' cacun' nihánj 'yaj uún soj, 'yaj nee man ma'an soj nanj adonj. Aj cataj xna'anj 'unj rihaan soj, ne cuano nihánj me se cataj xna'anj uún 'unj rihaan soj se vaa yuvii 'yaj danj ro', daj chihaa míj se cayáan nij so' ga Diose asa' guun chij Diose rihaan chumii nihánj a ma'.

²²Tzaj ne sese inanj rihaan Nimán Diose cuno ní', ne cunuu 'ee rá ní' tuvi' ní' do', guun niha' rá ní' do', gaa xej nimán ní' do', gaa inaj nimán ní' do', ve'é qui'yaj ní' rihaan yuvii do', yo'ó cuchuman rá ní' do', ²³síi ni'yanj a'mii guun ní' do', ve'é cutumé ní' man ní' daj qui'yaj ma'an ní' do', qui'yaj Nimán Diose ei. Inanj danj gaa ní' sese ve'é cuno ní' rihaan Nimán Diose nanj adonj. Yo' me sese qui'yaj ní' ndaa vaa taj nana nihánj, ne taj cacun' quitaj xráá ní' qui'yaj nana nihánj a ma'. ²⁴Dan me se ní' sij aj canoco' man Jesucristó ro', me se aj ticavi' Jesucristó man nu' se chi'ii man nimán ní', gaa cavi' so' rihaan rcutze, ne dan me se quisíj qui'yaj nee man ní' cacun', ne daj chihaa míj se qui'yaj uún ní' se chi'ii me rá nee man ní' qui'yaj yo' a ma'. ²⁵Dan me se che'é se cunuu sa' nimán ní', qui'yaj Nimán Diose, che'é dan yo'ó cuno ní' nu' se vaa cataj

xna'anj Nimán Diose rihaan ní' ei. ²⁶Se ca'mii xta' ní' a 'ó xco' a ma'. Se ca'mii ra'yunj ní' rihaan tinúu ní' a ma'. Se guun xcoj ruvaa rá ní' ni'yaj ní' tinúu ní' a ma'.

Nana nihánj taj xna'anj se vaa ve'é ra'cuíj ní' man tinúu ní' a

6 Sese ya xcaj nij soj cuentá se vaa qui'yaj 'o tinúu soj cacun', ne soj sij ve'é noco' Nimán Diose ro', nago' soj chrej man síi tumé cacun' daj qui'yaj so' rej rihaan so', tinuj, nocoj. Tzaj ne nica' gaa nimán soj, ne ve'é ca'mii soj nana sa' ga síi tumé cacun' ei. Dan me se tadó soj ga ma'an soj gaa nago' soj chrej ei. Sese se tadó soj, ne ma'an soj do' ca'anj chrej chi'ii nanj chuguanj. ²Dan me se ca'vee se me ma'an sayuun ran' tinúu soj, tzaj ne ra'cuíj soj man so' ei. Sese danj qui'yaj soj, ne síi qui'yaj nu' tucuáan cuchruj Jesucristó che'é ní' me soj gaa nanj chuguanj. ³Ne sese vaa síi guun rá se vaa síi sa' me ma'an so', ne síi ne ne'en uuxra' me so', ne síi tiha' yu'unj man ma'an me so' nanj ei. ⁴Tzaj ne naqui'yaj cuu 'o 'o ní' daj 'yaj ma'an ní', ne sese ve'é 'yaj ní', ne guun niha' rá ní' che'é se vaa ve'é 'yaj ma'an ní' ei. Tzaj ne ne nó xcúún ní' naqui'yaj cuu ní' daj 'yaj tinúu ní' ma'. Se cataj ní' se vaa sa' doj 'yaj ní' rihaan tinúu ní' ma'. ⁵Maan se ino vaa suun ata' 'o 'o ní', ne no xcúún 'o 'o ní' cata' ní' suun vaa rihaan ma'an ní' nanj adonj.

⁶Dan me se síi tucu'yón se-nana Diose ro', me se no xcúún so' cuxra' ta'aj so' nu' se sa' rihaan síi tihaan se-nana Diose nana sa' rihaan so' a.

⁷Tzaj ne se tiha' yu'unj soj man ma'an soj ma'. Se ca'vee tihá' soj man Diose ma'. Dan me se sese 'yaj yo'o so' sayuun rihaan chumií nihánj, ne gaa ndo'o sayuun quitaj xráá so', ⁸ne sese qui'yaj yo'o so' inanj se vaa me rá nee man ma'an so' qui'yaj so', ne nee man so' qui'yaj quiri' nū' so' nanj adonj. Sese qui'yaj yo'o so' inanj se vaa me rá Nimán Diose qui'yaj so', ne Nimán Diose qui'yaj gaa i'na' so' cayáán so' ga Diose nū' cavii nū' ca'anj adonj. ⁹Se guun rmií ní' qui'yaj sa' ní' ma'. Sese se quiri' rá ní', ne quisij güii cachrón Diose, ne sa' uxrá doj cavii ní', qui'yaj Diose ei. ¹⁰Dan me se yaj vaa ya'núj rihaan ní' ro', qui'yaj suun ndo'o ní' che'é se sa' cuano ei. Che'é dan ve'é uxrá qui'yaj suun ní', račuíj ní' man cunudanj yuvii ei. Tzaj ne doj a guun rá ní' račuíj ní' man nij tinúu ní' nij síí amán rá ni'yaj man Jesucristó adonj.

Nana nihánj taj xna'anj se vaa guun niha' rá Pabló inanj che'é se cavi' Jesucristó rihaan rcutzé che'é ní' a

¹¹Ni'yaj soj ei. Xij ndo'o vaa letrá cachrón ra'aj ma'anj che'é nij soj chuguanj. ¹²Nij síí me rá ve'é ca'mii yuvii che'é ro', ma'an nij so' me síí me rá cata' ta'nga' man soj nanj adonj. Danj 'yaj nij so' che'é se na'vej rá nij so' qui'yaj yuvii sayuun man nij so' che'é se noco' nij so' man Jesucristó síí cavi' rihaan rcutzé nanj chuguanj. Maan che'é dan a'mii nij so' danj rihaan soj nanj adonj. ¹³Dan me se ata' ta'nga' man nij so', tzaj ne ne

noco' sa' ma'an nij so' se-tucuanj Moisés ma'. Tzaj ne inanj me rá nij so' cata' ta'nga' man soj, gaa ne ca'mii xta' nij so' cataj nij so' se vaa cata' ta'nga' man soj qui'yaj ma'an ya nij so', che'é se qui'yaj nij so' fuerzá man soj, cataj nij so' a. ¹⁴Ne xa' 'unj, tzaj ne daj chihaa míj se ca'mii xta' 'unj ma'. 'O se guun niha' rá 'unj inanj che'é se cavi' Jesucristó sij 'nij ra'a man ní' rihaan rcutzé che'é ní', ne xa' chumií nihánj, tzaj ne ase vaa se cavi' ro', danj vaa chumií nihánj rihaan 'unj, ne taj yu'vee nó chumií nihánj rihaan 'unj, ne yo'o tanáj 'unj man se vaa 'yaj nij yuvii man rihaan chumií nihánj nanj adonj. ¹⁵Taj se 'yaj sese taj ta'nga' man ní' do', taj se 'yaj sese nuvi' ta'nga' táá man ní' do' ma'. Núj naqui'yaj naca Diose man ní', ne cavii sa' ya ní' nanj adonj. ¹⁶Me rá 'unj gaa xej nimán taran' soj sij noco' tucuaán nihánj, ne gaa 'ee rá Diose man soj ei. Ya yuvii israelitá me soj rihaan Diose nanj chuguanj.

¹⁷Dan me se aj quiran' ndo'o nee mán 'unj sayuun che'é se 'yaj suun 'unj che'é Jesucristó natá' 'unj rihaan yuvii che'é so', ne che'é dan na'vej rá 'unj qui'yaj soj doj sayuun mán 'unj a ma'.

Nana nihánj taj xna'anj se vaa me rá Pabló qui'yaj Jesucristó se luj che'é nij síí man Galacia a

¹⁸Me rá 'unj qui'yaj ndo'o Jesucristó sij 'nij ra'a man ní' se luj che'é nimán nij soj, tinuj, nocoj. Ya uxrá ei. Veé danj gaa ya ei.